

Uniun Parc Adula vul discutir cun Leuthard

■ **(rtr) Uniun Parc Adula n'è betg cuntenta cun la posiziun da la confederaziun davart il Parc Adula e vul discours cun Doris Leuthard.** I na possia betg esser che la confederaziun mettia ussa, var sis mais avant la votaziun davart il parc, en privel il project cun perscripziuns supplementaras, di *Peter Binz*, commember da la cumissiun da direcziun da l'Uniun Parc Adula. Quai suenter ch'ins haja elavurà las cundiziuns per il parc cun tut ils acturs e chattà cumpromiss che chattian l'accordanza tar ina maioritad dal pievel. La finala decida gea il pievel davart il parc. Tenor Peter Binz avess la confederaziun gia pudì reagir pli baud e vegnir cun questas pretensiuns. Da vart dal Parc Adula hajan ins adina infurmà davart il project. «Davart la zona circumdanta han ins adina ditg da-

vart dal chantun ch'i na dovria naginas pretensiuns. Ussa pretenda la confederaziun ch'i dovria mesiras da planisaziun dal territori en questa zona», declera Peter Binz.

Uschia gronda na sa quella surpraisa dentant betg esser. L'ordinaziun da parcs federala è dapi igl onn 2007 en vigor. Dapi lura savevan ils iniziants dal Parc Adula che i dettia restricziuns era en la zona circumdanta. Ed els savevan che la zona da coc na po betg vertir cumpromiss. Qua san ins propi dir ch'ils organisateurs dal parc èn ids en quai project cun egl blaus ed han pensà, che tut las excepziuns vegnian acceptadas da la confederaziun. Quai munta che cumpromiss ed empermischuns fatgas dals iniziants dal Parc Adula na valan betg per tut pretsch. Il svilup sco el sa preschenta ussa è aua sin

ils mulins dals adversaris dal parc. Sco la pledadra da medias da l'Uffizi federal per l'ambient *Barbora Neversil* ha ditg, saja questa posiziun be in pass tranteren - ina sort examinaziun preliminar da sboz da la charta. Ins guardia, schebain ils criteris sajan ademplitds ch'i dovra per che la confederaziun possia dar daners, ha Barbora Neversil declerà vinavant. La posiziun definitiva e la decisiun dettia quai da la confederaziun pir suenter che la charta definitiva saja inoltrada tar l'Uffizi per l'ambient. Actualmain èn ins londervi da preparar la versiun definitiva, quai cun resguardar uschè lunsch sco pussaivel las propostas ed ils giavischs ch'èn vegnids inoltrads suenter la consultaziun publica da la charta. La votaziun en las 17 vischnancas è planisada per ils 27 da novem-ber.